

# HARANA NG KULIGLIG

Tulang Pambata

2013 Palanca Award for Literature

## **Gagawa Ako ng Sariling Insekto**

Gagawa ako ng mga sariling insekto,  
naiiba sa karaniwang lumilipad o lumulukso.

Pararamihin ko ito sa aming hardin;  
kapag nakita'y kaya mo bang tukuyin?

Alitaplong, maripolong, niklong,  
salagulong, kuliglong, lamlong,  
gamuposa, salaposa, aliposa,  
putakposa, tipakposa, tutuposa,  
tutubinik, alitapnik, salaginik,  
kulignik, tipaknik, putaknik,  
salagulig, tutubilig, alitaplig,  
tipaklig, putaklig, gamulig  
gamukiti, tutukiti, salakiti  
parukiti, kuligkiti, gamukiti,  
tutuginto, aliginto, paruginto,  
gamuparo, mariparo, tipakparo,  
kuligtap, salataptap, tututaptap,  
kulitag, tipaktap, salagutap.

Lilikha ako ng mga bagong insekto,  
Kaya mo bang hulihin ang mga ito?

## **Harana ng Kuliglig**

Umahon ang kuliglig

mula sa kasuluk-

sulukan ng sukal

upang tuparin

ang pangakong

haranahin

ang nahihimbing,

ang antuking daigdig.

Katinig ang kapipisang sisiw,

ipaghehele niya ang pagal

na mga dahon.

Maliligalig

ang bugnuting bulaklak

sa mga pakpak niyang

waring nagbibiyulin.

Babaunin ng hangin  
ang kanyang awit;  
ilalatag sa kagubatan  
habang iduduyan siya  
ng pinilakang buwan

sa muli niyang pagbabalik  
sa bisig ng lupa.

## **Bakit Ako Mag-aalaga ng Laggam**

1. Hindi tumatahol.
2. Hindi nagmamaktol
3. Hindi ngumingiyaw.
4. Hindi dumudumi kung saan-saan.
5. Hindi mapanghi.
6. Hindi mabalahibo
7. Kaya hindi ako hinihika't inuubo.
8. Hindi nangangalmot.
9. Hindi uungot-ungot.
10. Kaya puwedeng dalhin sa mall at paaralan.
11. Hindi nagngangatngat.
12. Hindi nangangalkal.
13. Nagbubuhat nang hindi hinihinal.
14. Hindi matakaw.
15. Hindi nanunuklaw.
16. Hindi namdadamba't nandidila ng mukha.
17. Hindi pinupulgas o ginagarapata.
18. Ligtas sa rabies at galis.
19. Hindi nagwiwiksik ng ihi.
20. Sa pagkai'y hindi mapili.

21. Iniipon pa ang nahulog kong mumo't kendi.
22. Sinisimot ang natapong sarsa.
23. Walang kailangang hawla.
24. Walang kailangang kadena.
25. Hindi na kailangan pa ng bukuna.
26. Sa isang sulok o singit lang ang tahanan.
27. Hindi na pinaliliguan.
28. Modelo ko sa kasipagan.
29. Humanda nga lang kung ako'y makulit
30. Dahil masakit siyang nangungurot sa singit!

## **Mga Tanong sa Tutubing Kalabaw**

Tutubing kalabaw, tutubing kalabaw,

Bakit mas malaki

sa ulo mo ang iyong mga mata?

Kung may 30,000 lente

ang iyong mata sa kaliwa at sa kanan,

ilan itong lahat?

Nabibilang mo ba ang kumikindat,

kumukurap, at nandidilat?

Sa dinami-dami ng iyong mata,

Nakikita mo ba ang kinabukasan at kalawakan?

Nasisilip mo ba ang mga multo at mikrobyo?

Natatanaw mo ba ang manghuhuli

na isang batang mapanghi?

Ilang antipara, doble bista, at kamera,

ilang teleskopyo at mikroskopyo

ang iyong kailangan?

Ilang libro ang kaya mong basahin?

May nasisilip ka ba sa dilim?

Ilang balde ka kung lumuha?

Ilang tuwalya ang iyong nababasa?

Dumudoble ba ang iyong tingin

kapag ikaw ay naduling?

Yumayaman ka ba

kahit sentimo ang suweldo?

(Tingin kasi mo ba sa mamera

ay 60,000 barya?)

Halata ba kapag ika'y kirat?

Nasaan ang iyong talukap?

Paano kung ika'y nagkakuliti?

Kapag kumati, isa-isa mo bang kakamutin?

Paborito mo bang laro ang pitik-bulag?

Napapagod ka ba sa 30,000 kindat?

Hinihinal ka ba sa 60,000 kurap?

Kahit sa pagtulog, lagi kang dilat?

Tutubing kalabaw, tutubing kalabaw,

mas malaki rin ba sa iyong ulo

ang naiipon mong muta tuwing umaga?

## Tutubing Karayom

mula sa lawa,

unti-unting

susundot,

tutusok

ang tutubing karayom

sa himpapawid.

hihilahin ng hangin

ang pinilakan niyang sinulid;

kakampay ang kanyang mga pakpak

gaya ng mga daliri ng mananahi.

tatahiin,

pagdurugtungin

ang mga retaso

ng halimuyak-sampagita,

bagong-tabas na talahib,

at nakakubling nektar

ng mga santan.

pinagtataghiin niya  
ang mga natastas na tela  
sa pagitan ng bagyo,  
baha, tagtuyo.  
umiindayog siyang  
magbuburda  
ng nagniningning na lunti  
sa hardin kapag tanghali.

pagkaraan, dadapo  
ang tutubing-karayom  
sa aking palad--  
maghihintay na ako naman  
ang magsulsi  
sa mahabang kumot  
ng tag-araw.

## **Bugtong, Bugtong**

hito nang ako'y bata

agila nang tumanda

*-tutubi*

pambihirang usa sa Jolo

isang bayan kung makalukso

*-pulgas*

sanggol pa lang si Tonyo

isa nang arkitekto

*-gagamba*

kalabaw ko sa Panginay

karga-karga'y limang bahay

*-langgam*

binti niya'y hindi nga mabilang

lagi namang huli sa takbuhan

*-singsing-pari*

gumulong na ang ulo  
nagsayaw pa ng tango  
*-ipis*

tinikman ko ang ulam  
gamit ang talampakan  
*-langaw o paruparo*

ako ay nagrosaryo  
saka namugot-ulo  
*-sambasamba*

kita'y aawitan  
bago pagnakawan  
*-lamok*

noong sanggol ay peste  
nang tumanda'y bayani  
*-higad na naging paruparo*

nagsamalamig, nagpabango

bago ihatid ang koreo

*-paruparo o bubuyog na akto ng polinasyon*

nars na bubulong-bulong

bago mag-ineksiyon

*-bubuyog*

ga-munggong manlalakbay

sa higante namahay

*-niknik ng kalabaw*

kukupad-kupad na kawal

nagsuot ng kapang bakal

*-uwang*

sa aking patikim-tikim

nagkakakulay ang hardin

*-bubuyog, pukyutan, paruparo (dulot ng polinasyon)*

maglilinis at maghihilamos  
saka magtatampisaw sa bulok  
*-bangaw*

isang butil ng palay  
naging pasas kay Bantay  
*-garapata*

maliit pa lamang si Onyok  
lumilikha na ng palayok  
*-putakti*

manggagawa sa Tabuk  
umuukit ng bundok  
*-anay*

ipot na binilog-bilog  
pinapak hanggang mabusog  
*-sumbang-tae*

## **Tibok ng mga Gintong Puso**

Titibok-tibok, pipintig-pintig  
ang aking mga gintong puso  
sa tuwing tumitiririt  
ang mga pipit sa aking mga sanga.

Kinikiliti ako ng makulit na kuting,  
pilit akong kinikilala,  
inaakyat at sinusukat  
ang katawan ko't balat.

Sumisilong ang mga salagubang  
sa aking malinamnam na dahon;  
binabantayan, binabakuran ng mga hantik  
ang mga nahihinog na gintong puso.

May umiidlip, nananaginip na kalabaw  
sa aking paanan. May kakaba-kabang dumapo,  
papaga-pagaspas na mahiyaing mariposa  
ang nais manirahan sa aking lilim.

Tumatayog ako, lumalago  
nang umangkas sa aking mga bisig  
ang isang batang yakap ang aklat—  
tinutulaan at pinapangarap  
ang aking mga gintong puso.

## **Masasakit na Salita**

Yabag ng mga nagulat na kabayo

Ang masasakit na salita;

Niyayanig ang aking diwa

At patuloy na nagdadabog

Hanggang malamog ang aking puso.

Lindol ang masasakit na salita.

Winawasak ang aking pangarap

Na matatayog na gusali't tulay;

Binubura ang aking pananaginip

Ng buwan at mga bituin.

Higad na nadikit sa balat

Ang masasakit na salita.

Sumasalubsob, tumutusok

Ang mga ga-hiblang tinik sa laman;

Tumatagos ito at gumagapang,

Hanggang mahinog ang mga pantal.

Ngunit nadadaig  
ang mga yabag ng kabayo,  
ang mga yanig ng lindol,  
at ang mga ga-hiblang tinik ng higad  
ng isang mapagkalingang yakap  
ng matalik na kaibigan  
o ng minamahal na magulang.

## **Pista sa Madaling-Araw**

Hindi na ako kailangang gisingin  
ng sumusuot na liwanag  
sa nahihimbing naming silid.  
Bago pa tumilaok ang tandang,  
nakahanay na ang mga buslo  
para sa pista ngayong madaling-araw.

Sinalubong kami ng luntiang hanay  
ng mga letsugas, petchay, at kinchay.  
Sumasabog ang nahihinog na amoy  
ng tsiko, durian, pinya, at melon.  
Waring litson ang matabang langka  
at umaapaw sa tamis ang ginintuang laman.  
Tila korona ang mga piling ng seniorita't lakatan  
at handang magpakurot ang mga lansones at rambutan.  
Nag-aagaw-dilaw at nag-aagaw-luntian  
Ang mga kaing ng mangga at papaya.  
Kumakaway ang talbos ng ampalaya,  
Kumikindat ang mga bulaklak ng kalabasa.

“Tikim na, suki,” alok ng kaibigang tindera.

“Matamis iyan.” Walang anu-ano’y

hiniwa niya ang namimintog na pakwan

at sumambulat ang rosas nitong katas.

Tama si nanay, ang mga bunga at gulay

ang pinakamagagarang alahas ng lupain.

At saka niya ako sinorpresa

ng paborito kong mumunting pulang puso

mula sa kabundukan ng Cordillera.

## **Mga Pangarap ng Aming Takure**

Tuwing umaga,  
kapag magkakape na si tatay  
o mag-iinit si nanay  
ng tubig-pampaligo,  
umaawit, bumibirit, pumapaswit,  
sumasagitsit, sumisirit, sumisitsit,  
tunitirit  
ang aming takure.

Tumitilaok  
siyang parang tandang;  
sumisipol  
tulad ng hinihipang silbato.

Humihyaw pa  
gaya ng elepante;  
tunitili, nanggagalaiti,  
animo'y orasang nanggigising  
kapag tinatamad kaming bumangon;

at nakuha pang magmaktol,  
waring bulkang sinusumpong.

At lagi't lagi,  
hinahayaan naming umapaw  
sa pangangarap ang aming takure.

## **Mga Ulap sa Baguio**

1.

Maamong tuta,

humahalik sa aking binti

ang lagunlon ng ulap.

Naglalambing,

tila may hinihiling.

Pilit kong kinarga

pero dahan-dahan

namang lumundag,

lumukso;

yayakapin ko'y napakailap!

2.

Mayamaya, dinumog

ako ng mga ulap,

tila pitumpu't pitong

puting tupa.

Nang hinaplos ko'y

gumugulong, umaalon,

sumusulong,

lumulusong-umaahon.

3.

Lumilok ako

sa mga kimpal ng ulap:

pugita at butanding,

korales at pusit,

lumba-lumba at pating,

taklobo at bituing-dagat.

laalay ko ang lahat ng ito

sa asul na kaharian

ng kalangitan.

## **Kagabi, Umulan ng Tsokolate**

Kagabi, umulan ng tsokolate,  
ng malapot at purong-purong tsokolate.

Tsokolate ang umaaagos sa kanal at daan.

Tsokolate ang kumumot sa buong hardin.

Tsokolate ang naglalawa sa bawat bakuran.

Tsokolate ang mga damit na naiwan sa sampayan.

Tsokolate ang aming tsinelas at sapatos.

Tsokolate ang sumuot sa aming medyas

Tsokolate ang mga palakang naghahagikhikan.

Tsokolate ang naipon sa mga paso ng halaman.

Sana'y umulan muli mamayang gabi.

Pero ayoko na ng tsokolateng malapot at umaalon-alon.

Gusto ko namang bumuhos ang paborito kong ispageti

(O kaya'y tatlong uri ng pansit: bihon, miki, at canton.)

## **Pintong Walang Silid**

Pinto akong walang silid.

Pinto ako tungo sa maraming mundo.

Kapag nakapinid,

isa akong bugtong, sikreto, misteryo.

Lumilitaw ang sari-saring pinto

sa bawat pagbukas sa akin

upang makalaya kayo sa apat na sulok.

Paulit-ulit akong nabubuksan

upang makapaghatid sa maraming lunan—

malayong nakaraan, malapit na hinaharap,

bagong-tuklas na planeta, at lihim na paraiso.

Nakatatak sa aking gulugod ang inyong pupuntahan;

nakaukit sa aking balat

at bawat himaymay ng aking laman

ang aking manlilikha.

May matutuklasang mumunting hiyas

kapag ginalugad ako ng isang manlalakbay.

Hindi ako nagsasara kaninuman,

bagong silang man o nasa dapithapon na ng buhay.

Makinis at malutong ako kapag bago;

marupok at nagpupulbos naman kapag luma.

Kaya akong ipaghele ng isang palad

o kaya'y yapusin ng mga braso.

Kasama ninyo ako sa pananaginip

at pangangarap.

Paulit-ulit akong dinadalaw

ng mga umiibig sa rikit ng mga salita.

Balang-araw, silang mga sumisinta

ay lilikha ng mga sariling pinto

mula sa maaabot ng kanilang haraya.

## **Bakit Ako Nagpapalipad ng Saranggola**

Nagpapalipad ako ng saranggola

Dahil siksikan na ang mga kotse,  
bus, traysikel, at dyip sa mga kalye.

Nagpapalipad ako ng saranggola

Dahil makikipagpatintero ako sa mga maya't tarat.  
At ako itong wala namang pakpak.

Nagpapalipad ako ng saranggola

Dahil susundan ko ang ruta ng mga eroplano  
At maglalakbay sa malalayong disyerto.

Nagpapalipad ako ng saranggola

Dahil tutuklasin ko kung saan umiidlip at humihilik  
Ang araw at ang buwan.

Nagpapalipad ako ng saranggola

Dahil pipisilin ko ang malambot na ulap  
Tulad ng tatlong paborito kong unan.

Nagpapalipad ako ng saranggola

Para kalabitin si Bathala

Kapag nagpapakawala siya ng kulog at kidlat.

Nagpapalipad ako ng saranggola

Dahil tutulay ako sa bahaghari

At susundan ang dulo nitong hitik sa ginto't salapi.

Nagpapalipad ako ng saranggola

Dahil susungkitin ko pababa ang telong itim

At mag-uuwi ng sari-saring kutitap ng mga bituin.

## **Kung Bakit Ako Pumipikit**

Pumipikit ako

Dahil masyadong maliwanag

At humahapdi ang aking mga mata.

Pumipikit ako

Dahil nanginginig ang aking mga ngipin

Sa napakalamig na ice cream.

Pumipikit ako

Dahil nakatitig ang aso sa akin

At baka ako'y kanyang kagatin.

Pumipikit ako

Dahil matalas ang titig

Ng dentistang masungit.

Pumipikit ako

Dahil may mabagsik na hangin

At para akong mapupuwing.

Pumipikit ako

Dahil napakaasim ng mga kamias

At wala namang asing masasawsawan.

Pumipikit ako

Dahil madilim na sa labas

At ako'y dapat nang humimbing.

At siyempre,

Pumipikit ako upang makita

Ang aking magiging magandang panaginip.